

Sudas Sesus tuktsa bo ziwatahaka

Sudas Sesus tukytsa, Tsiaku tsy. Sesus tuktsa hi ziwatahaka, iwaze nisispirikpoko. Sihyrinymyrytsa wasanibara ty nisihyrinymyryky ana humo hi — pykyhytutaha sibo batu yh̃ tsimaha — niy. Deus Sudas ziapepewyky iwatahi Deus harere ziwatahaka. Aba katsa kino niwatihi ana hi tanymyryky.

¹ Uta Sudas. Sesus Kiristu tsumuēh̃tsa. Tsiaku tsy. Ikiahatsa bo piwatahaka. Deus hi zahawatawy. Deus myzo babata. Atahi ahahumo tsimypokzitsiarēta. Sesus Kiristu ahahumo tsimypokzitsiukrēta. Pahapokzitsiki.

² Uta Deus bo ahatsyhyryze mopamykysoko:

— O myzo ahyrytsa humo amypokzitsihukta. Batu paikpa mytsaty mykaranaha. Ahumo sakurētsa. Botu sihumo tsimypokzitsiukrēta. Tysipokzitsitohikta — mykara.

Iwa Deus bo ahatsyhyryze mopamykysoikik.

Deus soho humo mymyspihikbatakanahatsa.

³ Kaharereziuwyttsa mytsaty ikykara:

— Abaka katukytsa bo piwatahaka. Sesus Kiristu tazo bo mymyoktyhyryk. Mymysapybyitsa tsikykaranaha Sesus humo mekywa tu tsimoziknaha, anahi tawatahaka iwatatu batu. Tapara Sesus tahyrinymyrywy ty nimyspirikpoko. Anahyrinymyrywy papeu humo pykyhytu ziwatahaka ana ty hi piwatahakazo. Anaspirikpowy humo ka ja spiriktsokda spiriktsokda byijataha ana humo hi tsimyspirikponaha — mykara.

⁴ Kytsa Sesus humo sispirikpobyitsa ahapapatu izumunaha. Siharere meky watu. Asaktsa:

— Deus isapyha ty mybo nyny my. Iwatatu zeka tsip-isapybyikinaha Deus tisapyrēna ty mybo nyny mykara. Mymysapybyitsa tsimykaranaha zeka myhumo ba ziky — mybarapetu mykaranaha. Sesus Kiristu ahapehatsa babata. Sesus Kiristu batu sipehatsa iharere bo batu yh̄y mykaranaha. Siharere meky watu. Deus bo batu yh̄y mykaranaha. Tubabatu Deus sisoho mybo nitsasoko.

— Iske myparawy watsa iwaze kytsa sihumo pimiyikinaha — niy. Siharere humo Deus ispe niy:

— Ikiahatsa batu wasani tsimykaranaha iwaze sinini ykarawy bo pahapehahik — niy.

⁵ O kytsa mytsaty tynakaranahaktsa! Tubabatu Deus Isareu tsekokatsa Esito bara botu nisioktyhyryk. Deus humo sispirikpo byitsahi nisibabaik. Ana humo ka botu ahahyrinymyrētsa, kaokzeka anasoho bo hi mytsatyziu tsimaha zeka wasani tsimaha.

⁶ Wastuhu bijoikpe Ezektsa soho bo mytsaty tsimykaranaha! Asahi simysapybyitsa nikaranaha, Deus harere bo batu yh̄y nikaranaha. Iwatahi sinini ykarawy bo nisipehahik. Sinini ykarawy miwa anaeze mynapykyryknaha ba zikziponaha. Sesus Kiristu myziksizoze sinini tohi maha. Anasoho bo mytsatyziu tynakaranahaktsa!

⁷ Iwaze hi Sodoma, Komora eze zikzurukunahatsa iwaze ustsas siututsa pauksitsa ahatsa ana Ezektsa sisoho bo hi mytsatytaha. Sihudikhudikwy Ezektsa makutsa tu naharapewowohikiknaha. Tapara wastuhu bijoikpe iknyktsa iwa ziknakaranahatsa iwatahi Deus sinini ykarawy bo nisipehahik. Anaeze izo zuba eze mynaharakorokonaha tawahi ba zikbe, anaeze tahawahi sinini mynakaranaha. Anahumo Deus mybo nitsasoko ana soho bo hi mytsatyziu tynakaranahaktsa!

⁸ Asaktsa sispirikpobyitsa ahabo izumunaha. Simysapybyitsa tu mykaranaha. Sitsotuspykrēnikitsa watsa iwaze hawa ha ty imysapybara ty mymyhyrinymyryknaha. Deus humo sispirikpobyitsa asa zuba siakparawy, Deus harere soho pisapybyikinaha. Iharere bo batu ma zikaha. Bijoikpe ezektsa Deus tsumuēhītsitsa mysisapybyrikinaha. ⁹ Bijoikpe ezekta Mikeu inarokotakta niwa ahata. Atahi taparakta bijoikpe ezektsa Deus tsumuēhītsa. Hyrikoso sapybara pehakatsa Satanas ituk nipamykysokoze, ipe niy:

— Aty sa nihyrikosokdata Moises nury nitsahorok — niy. Ana humo kino niharapepehakanahaze Mikeu tihi:

— Utakta ba zabetsak Deus zuba ape my. Abo awatutykta, Deus zuba pabetsak — niy. Hyrikoso sapybara pehakatsa Moises nury humo Mikeu kino batu tyso. ¹⁰ Asahi ahabo zumunaha Deus harere humo sispirikpobyitsa sihyrinymyrybyitsa hi pimykiknaha. Sihyrinymyrybyitsa hi mopyknaha, asaktsa siraratsa watsa taha bo zuba mytsaty mykaranaha. ¹¹ Asaktsa sinini mykaranaha. Simysapybyitsa tu mykaranaha ana humo hi sinini mykaranaha. Niwahi Deus mozihikik.

Asaktsa Kaĩ watsa sizokdirētsa mozurukunaha ana humo hi sinini mykaranaha.

Asaktsa Barão watsa. Atahi okyrysaro zuba iakparawy iwatsahi imysapyrēnikia siakparawy ana humo pimykiknaha Barão watsa.

Asaktsa Korã watsa Deus harere bo batu ma zikaha Korã watsa maha. Iwatahi Deus sisoho humo:

— Asaktsa batu simysapy mykaranaha — mykara. ¹² Asaktsa sisopyksapybyitsa ikiahatsa tuk mozumunahaze ioktsirōrōnikia watsa maha. Ikiahatsa ahadisahawy tsipahadisahakanahaze Sesus ahasapyzekenihyrikosokda ana bo hi mytsaty tsimykaranaha, asa kino ahatuk ioktsirōrōnikia watsa maha. Duabohotsa tsik

tsipikunahaze Sesus ahasapyzeken nihyrikosokda ana bo hi mytsaty tsimykaranaha, asaktsa taha bo zuba mytsaty mykaranaha. Sisikpybybyitsa tu asa zuba mytsaty mykaranaha. Utsa humo batu simypokzitsi.

Asahi bijo zatata watsa. Bijo zatata zuba hyritsik ba ziknawõ. Bijo zatata zopoktsa tuk mopapararak zekywaha ba zikziksizo.

Iwaze asaktsa hwi watsa iharakawy pomoze ba zikthara. Hwi haratatsa bobokohotsa watsa tahawahi mokbanaha.

¹³ Asahi pihik ihiridawy watsa. Pihik ihiridawy humo itsiksoroporo nimirazata bo pipapararakze ky waha. Asahi sisikpybybyitsa simysapybyitsa tu mykaranaha kytsa okze tu mynakaranaha.

Asahi byrisoiktsa watsa. Byrisoiktsa nanabyitaba mynaukurunaha. Asa niwatihi paikpa mykaranaha. Asa kino pimykiknaha. Iwaze Deus sinini ykarawy bo mysipehahik. Anaenze miwahaeze zuba tahawahi mynapykyryknaha.

¹⁴⁻¹⁵ Tubabatu Enoke sisoho nitsasoko. Asahi Deus humo sakparawybyitsa soho nitsasoko. Tapara nipupurukuknahaze botu sisoho nitsaso. Atakta Enoke Adão tsekoka. Adão tsekokatsa sizubarëtsa. Adão tsekokatsa sete nipupurukuknaha. Kyze Enoke zinaropykyk. Atakta simysapybyitsa soho nitsasoko. Tapara simysapybyikitsa nipupurukuknahaze sisoho tihi:

— O asahi Deus humo batu siakparawy. Sisikpybybyitsa tu Deus okze ka simysapybyitsa tu mykaranaha. Wasaniyitsa mykaranaha. Isapybara ty mykaranaha. Deus harere bo batu hỹ zikaha. Iwatahi mypehakatsa bijoikpe ezektsa tatsumuêhītsitsa tuk mozumu. Mypehakatsa sizubarëtsa tuk mozumunaha. Myzumuze mypehakatsa ihumo simysapybyitsa mykaranaha ispe:

“Ikiahatsa katuk zeky batu ahamysapy” my. Iwa Deus sinini ykarawy bo mysipehahik — Enoke niy. Tubabatu iwa Enoke sisoho nitsasoko.

¹⁶ Asaktsa sisopyksapybyitsa taha humo tu tahakyrikinaha iwatsahi pimiyikiknaha. Taha bo zuba mytsaty mynakaranaha. Utsa kytsa soho humo mysisapybyrikinaha. Asa zuba mopamykysokonaha:

— O katsaktsa mysapyrëtsa — mybarapetu mykaranaha. Simysapybyitsa tu ustsá pe maha:

— Ikiahatsa wasani tsimaha — mybarapetu mykaranaha. Iwa mopamykysonahaze ustsá namy piakse tsihikiknaha. Iwa simysapybyitsa mykaranaha.

Asahi Sesus humo sispirikpoziubyitsa soho pykyhytutahaktsa.

¹⁷⁻¹⁸ Ikiahatsa kaharereziuwytša mytsatyziu tynakaranahaktsa! Nawa ha ty Sesus Kiristu ykzohotsa botu ahabo nitsasokonaha ana bo hi mytsaty tsimykaranaha. Ahape nikaranaha.

— Aibani mybarawy mopykze kytsa ahabo mozumunahaze pahasopykziubyikinaha Deus sakparawybyitsa pahamyijakanaha zuba. Tahahumo zihikaty zuba mynakaranaha ana bo zuba mytsaty mynakaranaha.

¹⁹ Simysapybyitsa Sesus tuktsa metutu tahasapy tsihikiknaha. Sesus tuktsa siharerewabymybararëtsa moziknaha ana hi mozihikiknaha. Deus hyrikoso situkbyitsa mynapykyryk. Hawa ha mozihikiknaha ana humo hi zuba mynakaranaha.

²⁰ O kaharereziuwytša botu Sesus humo ahaspirikporëtsa hÿ. Ihumo tyspirikpotohinahaktsa ahamysapyrëtsa tsimoziknaha. Deus bo typamykysoikiknahaktsa! Deus zikwy humo ibo tupamykysoikiknaha.

²¹ Deus ahahumo tsimypokzitsiarëta ana humo hi tsikspirikpokonaha. Deus ahahumo tsimypokzitsiukrëta ana

humo hi ahaspirikporētsa! Sesus Kiristu tazo bo pahaoktyhyryk. Ahawahi izo tuk tsinapykyryknaha. Ana hi taperyky — my.

²²Wastuhutsa:

— Sesus humo kaspirikporēta zeka kamysapybyita ikykara zeka piokzohik. Batu kanyhy — maha. Asa bo hi Deus wasania ty tsimytsasoziukunaha. ²³Utsa simysapybyitsa tysitsumuēhīnaha. Aty izo bo mynautsok zeka tyzezona. Anawaze simysapybyitsa tysitsumuēhīnaha niharakorobaik tawata. Wastuhutsa simysapybyitsa tu nikaranaha batu sisikpyby. Iwatsatu tysisapywykynaha. Sihumo ahamypokzitsirētsa. Pykyhytutaha! Hawa nikaranaha batu ahakparawy ba ahasopyk watu ba zikaha! Simysapybyitsa mykaranaha iwatsahi siwabyitsa!

Deus bo tysakibazikiknahaktsa.

²⁴O Deus zuba abazubata my. Atahi mynamykuwyky iwaze imysapybara ty tsimoewynaha. Sesus tazo bo mymyoktyhyryk iwaze Deus tuk mywahi tsimynapykyknaha. Iwaze wasani tsimaha. Katsaktsa mysapybyitsa tsikykaranaha atahi mymyokzohik ihumo meky watu tsimoziknaha. Mymysapyrētsa. Deus tukze mywahi tsimynapykyknaha mykurētsa. ²⁵Katsa ape tsimaha:

— O Deus ikia zuba Deus babata. Batu aty tohi ikia wata, ikia zuba myzo babata. Ikia Sesus Kiristu tsipeha atahi abo mymyoktyhyryk. Ihumo myspirikporētsa iwaze ikia bo mymyoktyhyryk.

O ikia zuba wasanita. Ikia tsamysapyrēnikita. Azikykyta ba hawa tohi zasukninaha.

O ikia zuba myhyrinymyrytsa babata. Ikia apuni-hikrēnikita. Aharere eze tu mybarawy tsikzukni nanabyitaba aharere. Tapara mybarawy tsikzuknize bijoikpe

ezektsa atsumuẽhĩtsitsa iwa nitsasokonaha abaka katsak-
tsa situk asoho humo tsimysakibazikiknaha. Mywahi atuk
tsimynapykyryknaha iwa tsimykaranaha — tsimaha.

Iwa my hỹ. De. Niwazuba.

Sudas

Deus Harere Aibaky Sesus mymyspirikpoko naha New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 19 Oct 2021 from source files dated 17 Oct 2021

2f0260ea-5969-5180-9ac5-183d63a989f1